



何大復先生集卷之二十一

五言律詩八十一首

十四夜對月集陶良伯

陶令堂中月深更酒為携金波流未滿白露迫含妻
鴻鴈秋江北芙蓉漢苑西一杯同悵望萬里各羈栖
十六夜月集侯汝立

秋月尚不減客堂清宴闌把盃看玉兔駐馬簇金鞍
漸覺歲時暮况驚關塞寒霜笳中夜發葉落滿長安
夜集勤甫宅時秉衡至

同鄉耽宴集浮歲感飄零况復故人至相邀明月亭

琴清繁玉露坐久密秋星從此異佳貺無忘瑤草青
同崔子鍾過董文玉宅

崔生亭伯與董子仲舒才不為相鄰近那能數往來
霜天留把菊風檻促行盃尚憶秋參落酣歌送我回
十月四日過良伯

古堂秋色暮霜晝靜煙沙鄰並常盃酒寒天尚菊花
流雲行苑細遶景抱簷斜隻鴈南翻去飄飄各念家

夜集世其次戴子韻

醴酒燕京夕朱絃楚客心情親不覺醉慷慨豈忘吟
夜集霜天迥藜藿雪館深江湘舊行地何日更南尋

正月四日同子純過劉汝忠次韻二首

並轡來仙第深盃好共揮遠天初夜色新月更春輝
燈夕看相近花時會莫稀雲霄望羽翼真喜接高飛

二

邂逅憐新歲朱絃為客揮風春歸柳色月夕助燈輝
歌酒三人共乾坤一笑稀看君俱妙思操翰忽如飛
顧以行諸客見訪次韻

海內朋簪盍天涯意氣親雪峰斜暮景霜草勁寒春
客夕留尊久仙曹染翰新諸君千里駿霄漢迴風神
齊齋春人日齋居過王德徵

齊居春晝冥獨過子雲亭雨雪逢人日江湖問客星
望來花漸發愁劇柳還青更話東歸棹遥遥海思停
立春管汝濟見過次韻

勝日高人過蓬門氣色新青榆初改歲白葡萄共嘗春
鼓吹闐京邑樓臺接漢津扳留慨時序晤語覺情親
寺中張子言自浙來話

石閣晴雲抱花宮夕漏催我遊天姥夢爾向海門迴
日月雙龍劔乾坤一酒盃山中問百草早晚折春雷
夜過劉以道兄弟

風燈懸岸館竹色靜春沙山水停湘瑟池塘到謝家

雪融花尚細烟裊柳初斜對酌情親夜能無戀物華

過城南寺

出城春漸近到寺日猶高野望增樓閣沙行散竹桃
吏情雙白鳥世故一青袍苦被微名繫乾坤無地逃
過以道喜其弟以正至限韻得衣字

美人今夕酒行子暮春衣常念賢兄弟經年望爾歸
喜占烏鵲噪愁慰鶴鴿飛譚浪相逢地銀缸照益輝

出遊城南寺

樓閣倚清沙春尋深一作景未斜聽鶯到竹院並馬入
桃花不倦登山屐猶遲泛海槎芳樽爛熳倒吾醉亦

忘家

王壽夫過分韻得吾字

自別君昆弟同遊獨愧吾十年常道路萬里各江湖
乍見形容異相思夢寐俱向來飛動意執手五雲衢
清明日同諸友遊城南寺

風晝人遊少沙郊馬並行穿花尋野寺冒雨出春城
骨肉新傷淚賓朋遠至情天邊有芳草故向客愁生

子純邀過東鄉

朝回聞折簡騎馬過西隣把酒對今雨看花逢故人
雲陰初薄暮鶯轉尚餘春向日江湖夢飄零見爾頻

亮公房雨後

夕宿西林院蕭蕭竹樹分風雷迴驟雨星月度微雲
妄色空中滅名香靜處聞早知禪可托未忍去人群

城東泛舟

水郭移尊宴沙原列騎停岸開平放舸林轉曲通亭
雨意雲垂白風情柳送青衣冠夕臨泛東望極滄溟
懷麓堂集將遊東園以風雨遂止二首

仲夏陰晴半林塘水石隈窻雲開遠色簷日度輕雷
雨阻東山屐天留北海杯門墻接苑樹長晝得遲迴

二

東圃春餘麗西亭晝不譁雨來留聽竹風起罷看花
堂是裴公野庄仍李相家庭皆有碧草早見茁蘭芽
李川甫戴時亮過訪

豈是高人室能勞二妙來炎天雷雨豁深院鬱蒸開
改席因風樹留尊對晚苔高吟俱感激琴罷轉餘哀
暮雨劉以正過飲

驟雨暮不止轟雷昨夜奔炎蒸三伏破風霧二儀昏
款客深投轄寬愁細倒尊秦川與楚塞留滯兩鄉魂
鑑上人房訪太和兄飲

雷雨思炎月塵沙苦冀方火拚河朔飲今醉雪山鄉
蘿月搖丹牖松雲抱石堂憐君依宿地棊筆轉清涼
同川甫寺中避暑

偶到清涼地番思苦熱哀水堂齒齒折風殿薜蘿開
逃暑無三伏憑虛有一臺西山晝雷雨不見洗天來
同李川甫鄒子家過張子言舍

白晝風雷過城波靜碧沙濕雲翻抱暑西日半籠花
元禮舟堪並鄒陽賦更嘉同遊仲蔚宅杯酒重年華
訪子容自荊州使回二首

使節荆門返文章楚郡傳綵雲神女賦班竹帝妃篇
吊古南遊日憂時止上年停盃問世事轉眼幾回遷

下馬逢今雨東堂覓舊醅入秋翻暑濕過午復雲雷
花已經年放人今萬里迴世情吾懶道但飲莫停盃

雨中劉汝忠過對棊觀詩談邊事作

城晚客居靜邊秋胡馬多黑雲浮日動白雨映天過
謝傳惟棊局劉琨只嘯歌異時安見汝談笑却干戈

中秋十三日子容樓

對酒中秋日憑欄萬里遙風高塞國鴈月近海門潮
興逐燕歌起魂從楚望銷無邊漢宮柳烟色晝蕭蕭

十四夜李川甫宅

獨院淹杯酌高秋驚旅魂風蟬急白露沙葉靜黃昏
月上看天柱潮來望海門平生壯遊志非爾向誰論

十五夜劉子緯宅子靜初至對月

長安今夜月復滿桂花輪笛裏三年淚尊前萬里身
關山上雲霧樓閣下星辰况接離群友悲歌對愴神

過宗哲故宅

過門猶宿昔駐馬復誰留雨院殘春竹風庭折晚榴
還家無二頃歸櫬有孤舟日暮隣人笛凄然涕淚流

八月二十八日子容過對菊

近節逢花放開尊集異鄉乾坤共一笑風雨似重陽

誰識暮蟬意獨憐秋樹芳
它時益爛熳邀爾醉西堂
九月一日過劉氏昆弟對菊

謝庭看朔菊楚客醉燕邦
瓊樹元相對金花亦自雙
霜雲陰夕院燈火燦秋
愔待到重陽日還來倒玉缸
汝濟夜過同以行對菊

搖落相過地芳菲晚更親
酒醺留媚眼燈色笑生春
風雨新晴夜江山未老身
百年如不醉恐負此花神

同許補之劉子緯登定州塔

塔閣盤空上笙簫遶洞行
懸梯出萬井飛蓋俯孤城
燕岱風雲色溇沱鴈鴛聲
登高並回首直壯是神京

夜集錦夫同本貞限韻

萬里同鄉友飄零嘆此逢
江山饒涕淚歲月老形容
風散城邊角雲傳海上烽
中原尚格鬪未可問雲松

繡水晴瀾

獨憐繡溪水却出錦屏山
岸夾桃花浪沙明碧石灣
泛霞開激灑乘月弄潺湲
千載高人去誰來釣此間
以行自西山還相訪

聞汝西山去題詩十日還
獨行翠微裏應到玉泉灣
石壁雲孤裊冬巖菊自斑
烟霞發妙思高詠眇塵寰
夜歸昌化寺

九後集卷之三
日落歸山刹松風處處聲幽深不易到昏黑更多驚
壑斷尋溪入峰迴截嶺行茲遊藉朋好奇絕冠平生
平坡

晚眺平坡上蒼茫萬壑前一僧行樹杪諸客到寒天
險駭將崩石清憐乍坼泉翠華公主塔縹緲碧山巔

圓通寺

曉問圓通寺青山拄杖尋飛梁裊石澗寒日抱霜林
殿閣攀躋遠關河眺望深下看孤鳥翼萬里送遙心

仁壽寺

塔廟開龍象叢林會法筵散花金布地拄杖石飛泉

漂泊登高興依棲習靜緣北風吹袖起昏黑下諸天

詠天寧寺塔

七級芙蓉起千年舍利藏地形標海嶽人代閱隋唐
鏡現三天象珠含四日光白毫空萬里處處有迷方

菊莊

吾憐陶處士瀟灑出塵埃白髮秋逾短黃花晚自開
百年常對酒九日漫登臺却顧輪蹄者悠悠徒爾哀

大功德寺

寶地烟霞上珠林霄漢間宣皇留殿宇今日共追
攀御榻臨丹壑行宮鎖碧山帝城看不遠時見五雲

還

王泉

行遊金口寺坐愛王泉名雲去隨龍女風來動石鯨
入宮朝太液穿苑象昆明却望天河水迢迢萬古情

望湖亭

獨上湖亭望霜空萬里明檻疑天上立槎是斗邊行
雲霧開山殿芙蓉暗水城先朝四百寺秋日偏題名

慈恩寺

海子橋西寺高樓御苑花中流自日月平地有烟霞
客至開金殿宸遊想翠華十年復到此朋輩各天涯

一舫齋

乾坤聊一舫高卧此齋深竹散琴書色窻開島嶼陰
乘桴浮海意擊楫渡江心無限風波裏何人嘆陸沉

鏡光閣

峻閣岩堯上層城眺望中風鈴齊送響雲磴曲盤空
海色搖窻碧蓬萊影日紅翠華無復到長鎖翠微宮

關門

虎衛關門迥龍沙塞曲深風雲時有氣日月晝長陰
中使西來訊千官北望心天寒漢宮闕翠蓋憶春臨

寄題蒼谷寺

曲水盤山地松門路不分青天望嵩少白晝吐風雲
過客空高興徵君自有文霜鍾翠微裏日暮渺相聞
鑑公房石鐙

石盃何年鑿瑤燈此夕然雲流自五嶽月色近諸天
定裏金輪轉光中玉鏡懸西來不滅影常照法筵前
張侍御仲修送弓

繡服意相親彫弓把贈新獨憐投筆志未老據鞍身
晝控鳴風鏑宵彎抱月輪倚天時一望西北有胡塵
新鄭道中

客路臨新鄭雲沙望轉平夕烟生斷塹野水入荒城

下馬看碑誌逢人問地名千秋陵谷在懷古益多情

淇門

何處問商圻荒原尋斷碑鷄鳴深市井鴈入古城池
斜日人空吊浮雲世自移祗餘淇上竹綠色映寒漪

銅雀臺

美人望陵處無復翠華過殿冷閑歌吹宮春罷綺羅
落花嬌靨盡芳草怨魂多日暮漳河水東流空白波

壽鄭廷瑞太守

五馬歸來日閑身六十強春花自爛熳雲水共徜徉
邑種萊公竹邦留召伯棠平生天下志白首付滄浪

初度

此日吾初度深盃且自揮眼看兒女大身覺弟兄稀
未得浮滄海徒然傍紫微齒年今不小心事已多違

秦翁輓章

不見此翁起誰尋處士家邑人傳月旦蒿里慘霜笳
水面藍田月春殘清渭花隴雲深一墓寒月晝空斜

輓謝晚耕

五十不入城獨吟稱晚耕日南提劍志海上却金名
故里松猶在秋田草自生江湖夢顏色悵望有餘情

輓謝中丞

閩海通南極三山產異才循良三歷郡鎮靜久登臺
神鬼愁先見蠻夷望復來誰看大星落天柱使人哀

吳中丞雙輓

近讀中丞傳無聞節婦吟死收銅柱績生有栢舟心
滄海空潮汐青山自古今雙魂俱不泯何恨九泉深

海嶽陳翁輓章

白雲送秋老一墓海門邊花憶啼鶯日風悲種樹年
人間餘翰墨天上有神仙從此遼東鶴千年更一旋

百戰

百戰將軍死中原將士哀山河猶汗馬霄漢已雲臺

敢料安危勢須還節制才南征聞日遠消息幾時來
觀兵二首

將帥俱分閫 朝廷再剖符選徒皆虎士戰馬盡龍
駒直指黃河外長驅碧海隅感恩須此輩萬一為捐
軀

二

組練回天地戈鋌白日搖王師一奮怒寇賊可潛消
使過傳金節軍行奏玉簫人言漢家將今是霍嫖姚
諸將

萬方皆寇盜諸將半公侯未息蒼生困猶煩玉食憂

珥貂前日賜汗馬幾時收莫倚兵車力安危在運籌
防寇

萬國猶防寇三年未罷師天清聞鼓角野曠見旌旗
岸雪晴含照山雲晚趁姿孤臣北上日想望太平時
盜起

盜起從畿甸徒勞將帥心徵兵搖白羽募士散黃金
天地河嵩隔風塵海岱陰萬方吹盡角此曲淚沾襟
花當

聞道花當種綠邊部落遙百年為漢衛每歲款天朝
犯順若無敵肯恩誰爾驕側想 文皇日龍驤親渡

遼

內直遇雪

杳杳城雲影蕭蕭急霰催遠從仙閣度輕繞鳳池迴
弄日搖彤管含風引玉杯春還今歲早先報漢宮梅
入朝遇雨

躍馬天街霽趨朝冷色催好風先北起微雨自東來
柳拂重城鎖花籠複道迴萬方憂旱日沾灑望蓬萊
將雪有懷

長安十萬戶騎馬欲何之已動尋梅興空成采芻詩
雪心知霰集雲意怯風吹今夜西堂燭蕭然有所思

冬月

冬月少光輝霜天影漸微鼓鞀仍雪塞燈火自風扉
水凍蛟潛泣沙寒鴈不飛何時漢家將雙照羽旗歸

秋雨

斷續城頭雨空齋綠蘚封孤燈聞過鴈四壁起鳴蛩
細草傷心碧幽花滿目濃美人居綺陌幾日一作惆悵不
相逢

十七夜月思

秋夜已如此美人安在茲含顰向玉魄揚采憶蛾眉
嫋嫋芳香歇盈盈白露滋河關悵伊阻誰復訊佳期

何大復先生集卷之二十一

何大復先生集卷之二十二
五言律詩八十一首

雨雪曲

蒲海雲成陣天山雪作花
長城烽火入虜騎動鳴笳
霧深迷漢月風起暗胡沙
一夜關河冷征人盡念家

星變

星變干常紀花開與令違
九重方避殿四海望垂
衣賦歛何時緩流亡幾處歸
廟堂圖至理早晚答天

威

威
冬月

冬月今宵滿他鄉此夜情城高初影堞樓靜故當楹
霧濯寒輝苦風吹夕暈生捲簾愁不寐庭樹宿鴉驚

月食

月蝕中秋夜中天萬國看衣冠連大內鍾鼓動長安
光沒天河曉陰沉渤海寒 聖心應念此長望五雲
端

九月十五夜月

萬里高秋月青天此夜看乍流關塞影遙出海雲端
淅淅開風慢輝輝傍菊欄清笳奏城闕為報漢宮寒
中秋無月

月賞今年罷高樓獨客愁關山中夜笛江漢故鄉舟
暗雨捎簷入秋螢度檻流應知雲霧上天柱有人遊

六月望月食

未月黃衢厄妖遮赤道行魄殘疑近晦食甚始生明
秦鼓風颺慘登壇雷雨清攬槍猶未掃天意豈休兵

元日

元日王正月傳呼晚殿班千官齊鵠立萬國候龍顏
辨色旌旗入衝星劍珮還 聖躬無乃倦幾欲問當

關

五更

五更霜雪霽忽夢紫宸班
天上傳鐘鼓風前想珮環
鷄鳴無復詠馬動亦虛還
憶在先朝日朝朝見
聖顏

三月三日

病眼看天地風沙當晝吹
賞心孤酒伴行樂過花時
水曲蘭芳靜城陰柳絮遲
東郊有車馬春色報人知

秋夜

暝砌凝寒色高樓閉綺櫳
露蟲吟蟋蟀風葉下梧桐
此夜關山月何人悵望中
冷然感秋思况復聽征鴻

元夕

燈火萬家歡高樓玉漏殘
舞留華月緩歌裊綠雲繁
雪郭春初霽烟城夜不寒
畫橋垂柳外遊女珮珊珊

十月一日二首

今日孟冬朔輕烟澹曉墩
北風飄一鴈寒氣入千門
消息斷行客關河迷故園
浮生元不定俯仰任乾坤

二

嚴霜淒卉木茲歲忽將周
寂寂龍蛇蟄寥寥江海流
暮燈喧巷哭風角起邊愁
不盡中原望難尋萬里樓

歲晏

歲晏看人事蒼茫繫所思
浮雲當日暮積雪見春遲

報國元無術寧親未有期獨憐張內侍吟絕四愁詩

中秋

風塵悲海內滿月對長安聞道王侯第中宵晏未闌
暹雲催玉管生水弄金盤獨念南征將關山此夜寒

三月三日

三月正三日長安春可哀馬從南國至花向北人開
戎馬中原地鄉關萬里臺蹉跎嘆物色容易歲年催

清明日病懷

旅舍清明日長安新火烟桃花轉愁思竹葉興蕭然
客病閑官馬囊空澁俸錢故鄉聞稍定南望好林泉

謝崔太史惠菊

遺我高庭菊懷君秋樹林香添竹葉盞色助草堂吟
翠蓋翻風檻霜天倚玉簪晚芳如不歇可比歲寒心

觀荷

入院高荷密留尊齒菡萏遲絳房扶水萼翠蓋倚風枝
檻坐明星夕窻過驟雨時流螢點點度故傍綠陰池

寺中吾子館海石榴

西林雲晝靜覆院海榴花坐映東窻下疑窺鄰女家
枝枝搖綠水片片落丹霞錯比珊瑚樹光輝逼一作闕

日華

汝慶宅紅菊二首

紅菊開時暮亭亭冠物華亦知顏色好不是艷陽花
羅綺嬌秋日樓臺媚晚霞清香如不改常傍美人家

二

秋花何太艷綠盞慰飄零笑比西施醉愁憐楚客醒
雲高開爛熳烟細裊娉婷好為多沽酒頻來倒玉瓶

沈道士館牡丹

仙亭牡丹樹不數玉山桃忽漫相逢處開花爛熳高
彩雲停度曲遲日動揮毫明歲天壇路春風憶錦袍

雨中紅芍藥

百花堪獨立一雨更風流日暮行雲女仙裳覆楚丘
明添丹臉淚暗抱錦心愁晴晝猶須賞何人駐紫騮

長安柳

三月長安柳春風吹暮天花飛御溝水葉傍漢宮烟
繞岸猶堪折臨流更可憐故園無限樹零落戰場邊

芍藥

城中芍藥徧席上把殘枝上苑相看日春風爾較遲
艷歌翻錦瑟酣醉倒金卮南國今開罷園亭數夢思

觀竹

相國西垣第新看種竹成葉香鳴鳳宿根古蟄龍生

雨洗琅玕色風傳竽籟聲山林輕肉食心迹喜雙清

魯山院竹

泰公堂下竹覆地長新篁雨颭春墻碧風含石室涼
經行留下榻晏坐對焚香遺響流笙鳳時時落上方

聞鴈

見汝今南下憐予一望家亂聲求侶急高影背人斜
月靜林無葉雲寒菊有花萬行關塞淚秋日墮胡笳

鸚鵡

不恨金籠閉其如鐵鎖牢側身燕雪苦垂翅隴雲高
豈為能言語番令妬羽毛角鷹何猛氣翻掣錦鞵絛

春鴈

花初背楚澤雪罷度桑乾漸起隨春色高飛犯朔寒
晝停江國望陣倚塞門看憶爾常南北無嗟行路難

鴈

唳唳胡笳怨飄飄南鴈翔長風度關塞九月下瀟湘
積水浮連影遙空起斷行故園秋望盡聞爾淚沾裳

聞鴈

鳴鴈南方去人今北地聞水寒沉塞角沙暮起秋雲
獨叫如求侶相呼恐失群高樓潛望爾鄉思轉紛紛

麀

碧山誰放汝華館故相羈野性看人駭閑身顧影疑
草香春過處花暖晝眠時無限雲林好樊籠祇自悲

蘇子遊赤壁圖

垂老黃州客高秋赤壁船三分留古跡兩賦到今傳
落日寒江動青天斷岸懸畫圖誰省識千載尚風烟

彼美東隣子

彼美東隣子花間白日醺纖腰人不見妙曲轉愁聞
舞罷空明月歌餘尚彩雲章臺楊柳樹花暮落紛紛

雪夜九梅翁園同蒼谷宴集二首

郊城風雪夜騎馬叩誰門乘興寧迴棹寬愁數倒尊

茆堂開洞壑楓岸疊沙村朝市山林意非翁未易論

二

冬夜南園集携遊興未窮登臺望積雪下嶺逐迴風
駿愛林中馬冥思海上鴻不因蒼谷子誰識九梅翁

到鄆簡王敬夫

以下秦集

杜曲花無數城南柳更重去天惟尺五隔歲一相逢
雨過春陂水雲開紫閣峰好陪王學士杯酒日從容

同敬夫遊至華陽谷聞歌妙曲

名邑今重過終南第一遊山中白雪倡天上綵雲流
柳散秦川色花含杜曲愁同時霄漢侶十載卧林丘

過康子德涵彭麓別業
 不求金馬召翻愛碧山樓柳色閑門閉桃花曲徑迷
 酒船時問字翠壁有留題只此林泉好無煩到澣西
 不到將軍第秋清病起遲誰知平子後復有四愁詩
 月幌臨書帖風庭掩戟枝東橋好山水何日赴幽期
 九日同陳侍御鳳谷登宴
 栢臺驄馬使蘭谷鳳仙家暫駐三秦節來看九日花
 風霜高錦樹雲日懸清沙去去層霄上回瞻北斗斜
 送聞雲子還河內

爾西訪崆峒東隨河上公神仙自有友不與世人同
 玉屋留雞犬天壇躡斗虹白雲從此駕去去入無窮

卧病簡汝濟士奇時濟二首

卧病常遲起焚香獨燕居聊因謝簿領暫得弄琴書
 嶽色盈虛牖泉流遠暗渠雖然官府內不異在林廬

二

習隱開三徑耽幽構一齋吏人稀到戶鳥雀自馴堦
 藥補身差健詩成悶強排同聲二三子不見好音來

過馬谿田村居

宛宛清河曲團團翠竹村卧龍元勝地容駟已高門

野曠嗟峨出天寒雲霧屯何時還過訪無限欲相論

冬夜過仲木

漢殿詞臣第秦川處士家過逢遙慰藉文翰轉光華
夜興山陰雪春情渭北花江湖望霄漢相對一長嗟

寄彭幸菴中丞

山海藏身遠 朝廷屬望頻
駿功收戰伐龍卧偃經綸
星宿黃河氣風雲華嶽神
生才元有待終起慰斯人

贈張時濟陳伯行胡承之周少安三月三日
出城遊宴

芳筵開上日才子出京華暫別含香署俱停訪石槎
秦川平對酒漢苑曲穿花應共題春草相過謝客家

送張行人賚 大行皇帝遺詔使秦蜀

我皇忽晏駕君行辭直廬九霄持使節萬里捧哀書
湖望雙龍鼎橋回駟馬車錦城花滿樹爭識漢相如
清明日病卧聞三司諸公出城

伏枕花辰過閉門樽酒空賓朋臨水上供帳出城中
柳色龍池雨鶯歌杏苑風秦川多勝事遊賞未能同

秦府進曆

寶曆領天闕金樽宴錦軒萬年周正朔七葉漢宗藩

大復集卷之五
九
向日奠堦曉含風蕙砌暄同懽承睿款歌舞頌乾元
拜將壇

漢主西封日淮陰拜將時壇場如往日朝代幾遷移
王氣風雲歇雄圖日月垂江山弔故國誰復見旌旗

秦嶺謁韓祠

捫蘿登峻嶺級石上荒祠雪阻南遷路雲停壯望時
文衰真有作道喪已前知千載經行地高山空爾思

登五丈原謁武侯廟

風日高原暮松杉古廟陰三分扶漢業萬里出師心
星落營空在雲橫陣已沉千秋一瞻眺梁甫為誰吟

普緣寺有馬融讀書洞

春山尋古寺昏黑尚攀緣仄徑千盤轉巉崖萬仞懸
虎常啼白晝猿忽墮青天欲訪名賢洞泠泠隔澗泉
書院課士雨至有作

雨色閒堂靜橫經坐晝深笙歌非絳帳絃誦有青衿
竹勁捎簷碧松寒覆院陰萬人憂旱日洗耳聽秋霖
登樓鳳縣作

近訊中原使兼登萬里樓朝廷仍北極行在且南州
峽斷風雲隔江通日月流如聞乘八駿早晚向崑丘

東河三月晦日

雨宿東河夜送春山館寒遠沙霾霧樹危石上風湍
慣涉波濤險偏經道路難平生四方志回首欲求安

青峰閣曉霽

初日東峰上微微霽色分丹崖含宿雨青嶂拂歸雲
候騎林端發鳴笳樹裏聞前山更可愛晴望碧氛氲

草店雨行

山館夏陰澹雨行寒色淒奔湍迴白石折坂下青泥
棧道常通北江流却向西千峰問來路烟霧使人迷

馬道驟雷雨復霽

萬壑驚雷起千峰鳴雨過稍看風瀨減更覺夏雲多

虹飲垂青澗猿行掛碧蘿山中無吏事長嘯荅樵歌

弘道書院

梁棟起層雲松筠散夕曛九巖瞻泰岱清渭接河汾
冠蓋時時集絃歌夜夜聞登堂持節印衰薄愧斯文

咸陽原

千秋陵墓地駐馬惜茲行晚日登原殿晴天見渭城
望春時極目訪古獨含情柰有咸陽草風吹歲歲生

草堂寺

昔讀高僧傳今看勝地形院寒留檜栢殿古落丹青
寶塔參遺影荒臺問譯經駐車春日暮散步出林坰

說經臺

西海何年去南山萬古存風雲留福地星斗上天門
有欲誰觀妙無為自覺尊青牛不復返空誦五千言

普緣塔

石蓋凌空起丹梯出翠微雲從珠頂覆燈轉鏡中輝
鴈沼波濤湧龍宮日月圍何能攀絕頂一覽漢邦畿

碯溪

丈人昔未遇垂釣此溪中不感風雲會誰知八十翁
晚楓漁浦暗春草獵原空獨令千載下懷古意無窮

長春宮

夜宿仙人館晨聞鳳吹停玉牕開曉月丹井汲春星
久秘長生訣空留不死庭下山回一望巖壑杳青冥

益門

益門通漢沔棧閣上雲霄蜀道從茲始秦川望已遙
生風鄰虎穴迴日過龍標眇眇征途子雲山誰見招

新開嶺

塹山通大谷槎嶺掛天梯倚一作獨立飛雲上回看落

日低異花千種色怪鳥百般啼晚就松林宿烟昏度
碧溪

紫關

連峰入冥兩絕壁閃餘霞水認秦人洞林疑謝客家
石門踐苔蘚源口覓桃花他日求棲息無言此路賒

武關

北轉趨劉垠西盤出武關微茫一線路迴合萬重山
天地幾龍戰風雲惟鳥還關門鎖溪水日夜送潺湲

昭烈廟

漂泊依劉計間關入蜀身中原無社稷亂世有君臣
峽路元通楚岷江不向秦空山一祠宇寂寞翠華春

鹿苑寺

即摩詰宅

舊宅施為寺青山屬野僧高人不可見勝迹已無憑

色藉荒庭草陰垂古殿藤千崖一微逕異代幾攀登

過華清宮

冬一作偶駐華清殿千秋憶翠華青山無帝宅荒草半
人家雪下湯泉樹春回繡嶺花長安望不遠誰見五

陵霞

望終南

近覽南山霽遙迎西日曛黛橫千里色花抱一作挹五
臺雲城闕行相映川原望轉分丹梯懸石洞未訪赤

霞文

首山

王君首山下新起讀書樓雲霧懸蘿入湍波湧竹流
具茨黃帝宅嵩少羽人丘想待功成去方為此地留

臺雲如兩河口知以氣望轉公長赫赫可所未始亦

東下商南路西辭蜀北門青山兩河口古戍百家村
曲棧盤林杪危湍噴石根經過回白首蹤跡半乾坤

刻書

人空雪下長泉樹春回歸燕亦身安楚不難歸長正

何大復先生集卷之五十一

何大復先生集

何大復先生集卷之五十一

